



古今原始第十二卷

桐城趙鈇鼎卿著

○宋太祖皇帝

宋以周故相范質王溥魏仁浦同平章事吳廷
作為樞密使始廢宰相坐論禮

宰相坐論之禮始廢

初殿試貢士賜進士第

進士第始此後遂為例

初以文臣知州事

知州之名始於此

初置諸州通判

通判官始於此

初以常參官知縣事

知縣之名始見此三者皆以革藩鎮之弊也

先時郵傳率役平民太祖盡易之詔諸州府以

軍卒代百姓充遞運脚力

遞運以兵卒自此始

詔州縣徵科置簿籍

徵科始有簿籍後曰冊

宋置折中倉聽商人輸粟京師優其直給江淮

鹽

按此後世召商中鹽之始

制州郡俸祿無有定准多隨土所出有父母祖
父母年登七十者給見錢郡縣田祿以芒種為
斷

芒種以前去官一年俸祿盡歸前人以後者
歸後人宋制也

置權貨務

務名始此

始令婦為舅姑服三年

婦為舅姑服始此

置同修撰編修官檢討官

按編修檢討專以修史始於宋蓋專以修經武要略為職屬之樞密院與今不同

韃靼入貢於宋

此蒙古通中國之始

始制州郡盛暑恤獄

暑月恤刑始此

賜屢試不第舉人出身

特奏名科始此

立報水旱期式

報水旱有期始此

初置市舶司於廣州

廣州市舶司始此

始放進士榜

放榜始此

始禁道士不得畜妻孥

前此道士皆有妻室至是始與僧同禁

封交州丁璉為交趾郡王

此交人封王之始

初詔諸道轉運使糾察官吏

諸道糾察始此

太宗皇帝

賜江州白鹿洞九經

白鹿洞經書其來久矣

以石熙載簽書樞密院事

簽書之名始此

興國二年進士賜宴

賜宴自呂蒙正始

始以侯陟王明同判三司

判三司名始此

作秘閣分三館書籍置其中

秘閣始見於此

詔致仕官給半俸

厚致改始見於此

始分進士為三甲

進士分甲次自王世則榜始

賜新及第進士綠袍靴笏仍賜宴瓊林院

此開宴賜袍笏之始也

進士中第賜名於桂籍堂

此題名之始或云唐人題名慈恩寺進士自題也

淳化幸太學賜群臣坐時侍講李奭執經講堯

典一篇未畢講說命三篇賜奭帛三十疋

幸學講書始見于此

宴群臣于後苑賞花釣魚命群臣賦詩

賞花賜宴自此始

分天下州軍為十五路置轉運使

京東京西河北河東陝西江東江西浙東浙西淮南荆湖福劔南東劔南西廣南凡十五路各置轉運使

遣使募兵於諸州

州郡募兵始此

太平興國三年三月大宴大明殿

春宴自茲始也

采太子中允武允成踏犁式給宋亳人戶

其式不用牛而用人亦足便民又一制也

詔群臣迎養父母

迎養始此

以子襄王元侃為開封尹

宋制也

○真宗

以楊徽之夏侯嶠並為翰林侍讀學士祭酒邢
昺為侍講學士

此侍讀學士侍講學士之始

初給外任官職田

又一制也

以張齊賢為涇原諸路經略使

大臣行邊之始

始置閣藏先朝文籍設待制學士

自是每帝崩後皆置閣以藏御書此其始
始與契丹歲幣

此宋人納幣夷狄之始嗚呼國家取民賦稅
以養兵將以禦寇今以賂寇烏用養兵為哉
王欽若進泰山天書帝受之群臣上尊號

真宗澶淵既盟常以為愧欽若以天書解之
不過借以夸耀後遂信之以為真一國君臣
如狂然吁可恠也他日史臣脩遼史見契丹

故俗而後推求宋史之微宋自太宗幽州之
敗惡言兵矣契丹其主稱天其后稱地一歲
祭天不知其幾獵而手接飛鴈鴟自投地皆
稱為天賜祭告而誇耀之意者宋之諸臣因
知契丹之習又見其君有厭兵之意遂進神
道設教之言欲假是以動狄人之聽聞庶幾
足以潛銷其窺覷之志歟然不思脩本以制
敵又效尤焉計亦未矣

頒釋奠先聖儀并祭器於天下

先師始有祭器

上玉皇聖祖號寶冊

玉皇神祖始有號

冊上聖祖母懿元天大聖后

聖母始有號

上玉皇大天帝號

玉皇始有號

君 詔醴泉所立觀祥源又加真武號真武靈應真

始加真武號

制謹奉上真元皇帝聖號太上老君混元上德

皇帝

老子始有號

詔江州馬當上水府廣祐寧江王宜封福善安

江王太平州采石中水府濟遠定江王封順聖

平江王潤州金山下水府虛肅鎮江王封昭信

泰江王

封水府見於此

勅叔梁紇宜追封齊國公顏氏追封魯國太夫人

孔子父母始封

勅平官氏追封鄆國夫人

孔子妻始封

上封者言郊立天地神位不嚴宜重造詔王欽
若詳閱修製十一月一日版位成貯以漆匣昇
床覆以黃縑帕壇上四位以朱漆金字第一神
位黑漆金字第二黑漆黃字第三已下黑漆朱

字天地祖宗為一匣餘十二陛為一匣

版位用匣始見於此

加五嶽神以帝號

五嶽稱帝始此

以占城稻種給於民

此中國有早禾之始

以應天府為南京

始有南京之稱

始賜信州道士張正隨號真靜先生

漢張道陵之後世守其法前此未有賜以號也賜以號始於是是後凡嗣世者皆賜以先生號然無階品至胡元乃封為真人給以銀印視三品始有階品矣

始給諸州學田

學田始見於此

始開經筵

經筵始此

南郊禮畢大宴於廣德殿自後凡大禮畢比日設

宴如此例

飲福宴蓋自此始也

○仁宗

初置益州交子務

此交會之始按周禮小宰聽稱責以傳別特民間私相稱貸以為符驗公家未嘗為之漢皮幣惟王侯朝饗用以薦璧民間未用唐憲宗始為飛錢之法委錢京師以輕裝趨四方合券取之以通商賈之厚齋者其法執券以

取錢而非即以券為錢也宋真宗時張詠鎮蜀患鐵錢重不便貿易設質劑之法一交一緡以三年為一界而換之富民十六戶主之後富民衰不能償所負爭訟不息轉運使薛田請官為置務至是蜀守臣寇瑛置益州交子務以權其出入始屬之官而有禁焉自是以後始以楮代銅交子代錢限年以為界而交易之

皇太后劉氏崩謚曰莊獻明肅

舊制后皆二謚加四謚始此

知制誥葉清臣啓軍中傳信牌

此信牌所由始

以大名府為北京

始有北京之名

始置武學

武學始於此

始詔進士預殿試者不黜落

殿試不黜落此其始也

原姓
第廿卷
○英宗皇帝

詔禮部三歲一貢舉

此後世三年一開科之始

○神宗

行均輸青苗保馬免役方田諸役號為新法

用安石言變法宋自此多事矣

增置宮觀官

安石為此以處先朝舊臣與已異者一時公卿安於祠祿不知何故

詔鬻僧道度牒

以度牒徵財自此始

始以策試進士葉祖洽以附會新法擢首選

科目以文取士本非三代帝王之法既為上人所重而天下靡然趨之而世道亦由之升降宋自太宗重甲科之選擢居選首者躡取華要往往多為名臣自治平更三歲之制繼以王安石變一代之法倡一家之言一時士子咸希其意葉祖洽首迎合安石意得為首

選自是士風大壞得人亦不如前矣

詔百官坐罪免杖黥著為令

從蘇頌所請也自是刑不上大夫

立保甲法

始有保甲

行募役法

始有募役募役行於南則便行於北則不便

未可全非也

王安石議除去聲律對偶之文使學者專意經

術上各占易詩書周禮禮記兼論語孟子中庸
試義者須通經有文采乃為中格不但帖經墨
義而已

此後世經義之始

王安石廢春秋儀禮

後世不用儀禮取士始此

王安石行新法既鬻鬻坊場河渡又并祠廟鬻之令

人承買

後承買官地寺田始此

立太學生三舍法

有上舍中舍下舍之別

詔宗室非袒免親者許應舉

宗室應舉始行於宋

始置濟河司

河道有官始此

初策武舉士

策試武舉始此

李杞入蜀經營買馬于秦鳳熙河以茶博馬

後以茶易虜馬始此唐回紇以馬易茶西北

虜之嗜茶有自來矣宋人始置茶馬司

詔求水居船戶五戶至十戶為一甲以輸賦役

此水居戶賦役法也

割北邊地七百里界契丹

北地限入契丹可慨也

○哲宗

置春秋博士

始復春秋博士

分經詩賦為兩科

始分科取士

備六禮聘孟氏立為皇后

聘用六禮僅見於此

傳堯俞言監司以今蠶麥並熟催完積年逋欠
百姓必不以一熟之力了積年之欠且令帶納
一料候秋成更令帶納

後帶徵舊欠始此

陳瓘上書論國是

按國是之說始於孫叔敖其言曰夏桀商紂
不定是而以合其取舍者為是不合其取舍
者為非叔敖之意亦不欲專以其私取舍者
為是非而以衆人之所所同取舍者為是非
此國是之說所由起也王安石始自是其是
而盡非天下之人以為國是蓋借叔敖之言
以文其奸耳自後京卞輩祖述其說以籍天
下之口行一己之私孟子曰是非之心人皆
有之衆人以為是則是衆人以為非則非合

天下之人之言咸以為是者是則所謂國是也政不必立為一定之名以必天下人之同已也

詔進士專習經義

從此廢詞賦矣

徽宗

立八行取士科

八行取士見此

分州縣立黨人碑

又一世變也

詔改留守節察判官為承直郎書記支使防團判官為儒林郎留守節察推官軍監判官為文林郎防團推官為從事郎令錄為通仕郎知令錄為登仕郎判司簿尉為將仕郎後改通仕為從政登仕為修職將仕為迪功

今之官階皆本於此

詔以孔伋從祀孔子廟

此子思從祀之始

令宦者童貫製御器于蘇杭州

內官監製御器始見於此

禁史學

史學有禁

置道階凡二十六級

道者有階始此

上昊天上帝徽號

莫尊於天天神之最尊者上帝也謂之昊天上帝可謂極至而無以加矣天之不可名

帝之尊無以對恐徒襲之耳

大理入貢封以王

此大理入貢中國之始

始給道士俸

道士有俸始此

道士冊帝為教主道君皇帝

徽宗一日諷道士曰朕乃上帝元子為太霄

帝君憫中華被金狄之教遂懇上帝願為人

主令天下歸於正道卿可冊朕為教主道君

皇帝嗚呼封冊之制惟天子得以行之道士
何人敢以此而加之君上妄亦甚矣

科免夫錢

不用夫而但出錢徧索天下所得總二十萬
緡結怨四海矣且為厲階

始遣武義大夫馬政浮海通女真夾攻遼

通金好自此始

詔更寺院為宮觀僧為德士

又有德士之名亦一異也

初收經制錢

先是命陳遘經制江淮七路錢于杭州以供
餽餉遘議比較酒務及度出納錢糧取其贏
號經制錢為東南七郡之害

封宦者童貫為廣陽郡王

宦者真封王始見於此

○欽宗

詔出內帑及括借士民金帛遣康王構少宰張
邦昌往女真軍為質

中國質於夷狄始此

金初稅牛具

每牛三頭為一具每具稅粟五斗

立沿河江淮帥府

稱帥府始此從李綱之請也

高宗

女真禁繼父繼母之男女無相嫁娶

女真人中國未父即以華風變其國俗蒙古

不如遠甚矣今中國猶有習夷俗者何哉

初置見錢關子

特命張浚屯婺州有司請椿辦合用錢而路

不通舟錢重難致乃造關子付婺州召商入

中以給軍食商人執關子于權貨務請錢願

得茶鹽香貨鈔引者聽於是州縣以關子充

糴本未免抑配而權貨務又止以日輸三分

之一償之人皆嗟怨

始收諸路月椿錢

又一稅也

初制節度使以下象牙牌第其官資書之于牌
御書押字刻金填之仍合同製造一畝禁中一
降付都督府相臣主其事緩急臨敵果有建立
奇勲之人先給賜以為執守

牙牌宋有之但加之武臣非朝參懸帶者
和議成以何鑄簽書樞密院事奉表稱臣于金
前雖有石敬瑭彼非中原主也

詔臨安府置養濟院

養濟院始此

始定都臨安

是為南宋

夏四月女真遣使以衮冕來冊帝為大宋皇帝
嗚呼夷狄之禍至是極矣天冠地履為之倒
置秦檜之罪止通乎天可勝誅哉

女真製交鈔

元以來鈔製始此金史交鈔之製外為闌作
花紋其衡書貫例外書禁條闌不備書經由
行換之法及其印章花押元承其舊至今沿

用之中雖小異而其大槩實相同也宋之交
會猶與錢相為輕重而有稱提之法此後則
錢自錢鈔自鈔各自與物相為輕重矣

初行會子

會子其製不可考

以黃庭堅所書戒石銘于州縣曰爾俸爾祿民
膏民脂下民易虐上天譴其欺

頒戒石銘于州縣自此始

○孝宗

安南始稱國

按周必大云安南初封交阯郡王後進南平
王奏章文移止稱安南道孝宗時始封以王
稱國蓋宰相曾懷之失也夫安南在秦為象
郡在漢為九真日南象三郡魏晉至唐皆與
南海桂林同為嶺南郡縣五代始失之然猶
受宋之官爵自是遂以國稱而天下以高麗
真臘視之不復知其為中國郡縣矣

金以女真字譯經史

此又經史一厄也

監察御史陳賈請禁道學

嗚呼道學廼亦有禁乎

以朱熹提舉浙東常平茶鹽下熹社倉法於諸路

社倉之法始於此

○寧宗

蒙古哥渥温鐵木真起於幹難河稱成吉思可汗

是為无太祖此胡元之始

遣使如蒙古

始與蒙古通好

○度宗皇帝

始以顏回曾參孔伋孟軻並配孔子升顓孫師於十哲列邵雍司馬光於從祀

十哲從祀始此

賈似道以國計困於造楮富民困於和糴命侍御史陳堯道右正言曹孝慶上疏言將官戶田

產逾限之數抽三分之一回買以充公田但得
一千萬畝之田則每歲可收六七百萬石之米
其餘軍餉沛然有餘帝從之至有無田歸并抑
買自經者

又有買民田以充公田之議

西域人進萬年曆於蒙古

此回回曆法之始

蒙古號其國曰元

自古國號皆以地名以義起者始見於此

蒙古制江南人為十等

廼列儒於娼之下丐之上可笑也已此又古

今一大變也

古今原始第十二卷終

古今原始第十三卷

桐城趙鈇鼎卿著

○元世祖

始窮河源

自有河以來皆言其源出崑崙而以張騫之言為信至是始知其源出于星宿海也招討使都實受命行四閱月始抵其地既還圖其形勢來上言河出吐蕃朶甘思西鄙有泉百餘泓方可七八十里沮洳散渙不可逼視登

高望之如列星然名火敦腦兒火敦腦兒華
 言星宿海也群流奔轆近五七里匯為二巨
 澤名阿刺腦兒自西而東連屬成川號赤賓
 河又合亦里赤忽蘭也里木三河其流寢大
 始名黃河又岐為八九股行二十日至大雪
 山名騰乞里塔即崑崙也由崑崙南至闕即
 及闕提二地始相屬又經哈刺別里赤兒之
 地合細黃河及乞兒馬赤二水北行復折而
 西流過崑崙北又轉而東北行約二十餘日

至積石始入中國云約自河發源至中國
 及萬里然其間溪澗流絡莫知紀極崑崙之
 西人跡簡少而山皆草石至積石方林木茂
 暢世言河九折蓋彼地有二折焉

徵方外士丘處機至京師為立其教賜金印章
 曰神仙符命

此全真之所由始其學本於老而其說猶禪
 學也佛老之外又有此一學

詔省院臺司之事皆先啓太子而後奏聞

太子參決朝政元制也

元史食貨志元都于燕去江南極遠而百司庶府之繁衛士編民之衆無不仰給于江南自伯顏獻海運之言而江南之糧分為春夏二運至于京師者歲至三百餘萬石民無輓輸之勞國有儲蓄之富

按海運之法自秦已有之而唐人亦轉東吳粳稻以給幽燕然以給邊方之用而已用之以足國則始于元焉

開運通河

會通河之始

制加孔子號曰大成

孔子作春秋其意切於華夷之辨毫髮不肯假借豈有千八百餘年之後而受蒙古之號哉

○元仁宗

勅自今宦者勿得授文階
文階不以予闈宦始此

○元文宗

加封顏回為兗國復聖公曾參鄒國宗聖公孔
伋沂國述聖公孟軻鄒國亞聖公

顏曾思孟封公始此

○元順帝

江浙行省左丞李羅帖木兒為方國珍所執遣
官招降方國珍授以官

按先正有言元之失天下招安之說誤之也
雖然豈但元哉宋人有詩云仕途捷徑無過

賊將相竒謀只是招則其來遠矣

始改計月錢祿

先是宋郡國田祿以芒種為斷此前去官者
一年秩祿皆入後人此後去官者一年秩祿
皆入前人自元末始改計月錢祿後因之

唐宋人無有書進士於官銜之上者獨元末楊
維禎書李黼榜進士至刻之印章蓋黼死節之
臣欲自附之耳後皆因之

書進士於官銜之上自楊廉夫始也

鷄林子曰嘗謂三代天下秦寔間之而漢
唐宋以後之天下元寔間之以衣冠禮樂
之地迺有辮髮椎髻深簷胡帽袴褶窄袖
之類雜於其間而侏僂之言腥膻之味鄙
野之樂使民俗化之有不覺而入者是又
一宇宙也非我

聖祖一廓清之幾何其不胥而為夷也信有開
闢之功足以超越千古矣於戲盛哉

古今原始第十三卷終

